

## Կ Ա Ր Ծ Ի Ք

**Րաֆֆի Գագիկի Նալչաջյանի «Պետական ֆինանսական վերահսկողություն իրականացնող մարմինների իրավական կարգավիճակի առանձնահատկությունները Հայաստանի Հանրապետությունում» ԺԲ.00.02 «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ թեկնածուական ատենախոսության վերաբերյալ**

Րաֆֆի Գագիկի Նալչաջյանի «Պետական ֆինանսական վերահսկողություն իրականացնող մարմինների իրավական կարգավիճակի առանձնահատկությունները Հայաստանի Հանրապետությունում» վերտառությամբ թեկնածուական ատենախոսությունը նվիրված է ֆինանսական վերահսկողության հասկացության բացահայտմանը, վերջինիս դասակարգմանն ըստ տեսակների եւ ձևերի, ինչպես նաեւ ՀՀ-ում պետական ֆինանսական վերահսկողություն իրականացնող մարմինների՝ մասնավորապես, Ազգային ժողովի, Հաշվեքննիչ պալատի, Կենտրոնական բանկի, ՀՀ ֆինանսների նախարարության, Պետական եկամուտների կոմիտեի և գնումների հետ կապված բողոքներ քննող անձի գործառույթներին եւ դերին՝ Սահմանադրության 2015 թվականի փոփոխությունների համատեքստում:

Ողջ աշխարհում, առհասարակ, և Հայաստանի Հանրապետությունում, մասնավորապես, ֆինանսական օրենսդրության և համապատասխան ոլորտի հասարակական հարաբերությունների ներկայիս զարգացումների համատեքստում հեղինակի կողմից քննարկված և վերլուծության ենթարկված հիմնախնդիրները չափազանց արդիական են և ունեն գիտագործնական հետազոտության մեծ պահանջարկ: Հիմնավոր են հեղինակի՝ թեմայի արդիականությանը և խնդրո առարկա հարցադրումների հրատապությանը վերաբերող փաստարկները:

Հանրահայտ է, որ ներկայումս Հայաստանի Հանրապետությունում թե՛ իրավական կարգավորման, թե՛ գործնական հարթություններում առկա են լուրջ խնդիրներ պետական միջոցների անարդյունավետ օգտագործման՝ մասնավորապես, պետական գնումների կազմակերպման ոլորտում: Հեղինակի առաջ քաշած հարցադրումների՝ տեսական վերլուծության վրա հիմնված ամբողջական և համակարգային պատասխանները կօգնեն լուծելու այս ոլորտում առկա մի շարք խնդիրներ:

Հեղինակին հաջողվել է քննարկվող հիմնահարցերի վերաբերյալ ներկայացնել ինքնուրույն, հիմնավորված դատողություններ, գիտականորեն հիմնավորված հետևություններ, ինչպես նաև ՀՀ իրավական համակարգում ներառված մի շարք նորմատիվ իրավական ակտերի և (կամ) դրանց առանձին դրույթների կատարելագործման կապակցությամբ օբյեկտիվորեն արդարացված և անհրաժեշտ գործնական առաջարկություններ:

Ատենախոսությունում ներկայացված դատողություններն ու եզրահանգումներն ունեն գիտագործնական զգալի նշանակություն և կարող են օգտակար լինել ինչպես առանձին հետազոտությունների, այնպես էլ հայրենական օրենսդրության բարեփոխման համար:

Րաֆֆի Գագիկի Նալչաջյանի թեկնածուական ատենախոսությունն ունի տրամաբանական կառուցվածք. այն կազմված է ներածությունից, երեք գլուխներից, ութ ենթագլուխներից, եզրակացությունից, ինչպես նաև օգտագործված գրականության ցանկից:

Աշխատանքի առաջին գլխում հեղինակը անդրադարձել է ֆինանսական վերահսկողության հասկացության բովանդակության բացահայտմանը, ֆինանսական վերահսկողության խնդիրների ուսումնասիրմանը, որում ներկայացրել է նաեւ տարբեր հիմքերով ֆինանսական վերահսկողության դասակարգումը տեսակների եւ ձեւերի:

Աշխատանքի երկրորդ գլխում հեղինակը Սահմանադրության 2015 թվականի փոփոխությունների համատեքստում վերլուծել է ներկայացրել է Ազգային ժողովի, Հաշվեքննիչ պալատի և Կենտրոնական բանկի տեղն ու դերը պետական ֆինանսական



վերահսկողություն իրականացնող մարմինների համակարգում, ինչպես նաև գործադիր իշխանության մարմինների կողմից իրականացվող պետական ֆինանսական վերահսկողության առանձնահատկությունները:

Աշխատանքի երրորդ գլխում հեղինակը անդրադարձել է ՀՀ ֆինանսների նախարարության, որպես պետական ֆինանսական վերահսկողություն իրականացնող մարմնի դերի բացահայտմանը, ինչպես նաև գնումների հետ կապված բողոքներ քննող անձի կողմից իրականացվող պետական ֆինանսական վերահսկողության բովանդակության եւ դրա առանձնահատկությունների բացահայտմանը:

Որպես աշխատության ձեռքբերում կարելի է համարել նաև հետևյալ իրողությունները.

- Աշխատանքը շարադրված է պարզ և ընկալելի լեզվով, ինչը վկայում է քննարկվող հիմնախնդիրներին լիարժեք իրազեկվածության, թեմայի վերաբերյալ սեփական դատողությունները մատչելի շարադրելու հեղինակի կարողության մասին:

- Աշխատանքի պաշտպանության ներկայացվող դրույթներում հեղինակը զերծ է մնացել զուտ միայն իրավակարգավորման կատարելագործման առաջարկություններ ներկայացնելուց և աշխատանքի այդ հատվածում ներառել է այն տեսական ընդհանրացումները, որոնք ապագայում կարող են հիմք հանդիսանալ կոնկրետ իրավական կարգավորման նախագծեր մշակելիս: Աշխատանքում պաշտպանության ներկայացվող դրույթները հստակ տարանջատված են եզրակացություններից: Նման պայմաններում հեղինակը զերծ է մնացել աշխատանքի այս երկու հատվածների անհարկի կրկնությունից, ինչը երբեմն հանդիպում է այլ ատենախոսություններում:

**Ընդհանուր առմամբ դրական գնահատելով ատենախոսությունը՝ ատենախոսության առնչությամբ, այնուամենայնիվ, նպատակահարմար ենք գտնում ներկայացնել հետևյալ դիտողությունները.**

1) Ատենախոսության առաջին գլխի՝ «Ֆինանսական վերահսկողության հասկա-

ցությունը, խնդիրները և տեսակները» վերտառությամբ ենթազլխում հեղինակի կողմից բացահայտվում է ֆինանսական վերահսկողության հասկացության բովանդակությունը: Ուսումնասիրելով տեսական գրականության մեջ ֆինանսական վերահսկողության բովանդակության վերաբերյալ արտահայտած տարբեր դիրքորոշումները՝ հեղինակը վերոհիշյալի հիման վրա տալիս է ֆինանսական վերահսկողության ընդհանրական հասկացությունը: Գտնում ենք, որ «ֆինանսական վերահսկողություն» եզրույթի ուսումնասիրությունը և հասկացության սահմանումը ավելի արդյունավետ և ամբողջական կլիներ, եթե հեղինակը նաև բացահայտեր «վերահսկողություն» և «հսկողություն» եզրույթների բովանդային տարբերությունները:

2) Հաշվեքննիչ պալատի կողմից իր լիազորությունների պատշաճ և արդյունավետ իրականացումն ապահովելու հիմնավորմամբ՝ հեղինակն առաջարկել է վարչական պատասխանատվություն նախատեսել Հաշվեքննիչ պալատին անհրաժեշտ տեղեկություններ և նյութեր չտրամադրելու, ինչպես նաև հաշվեքննության ընթացքին խոչընդոտելու համար: Գտնում ենք, սակայն, որ հեղինակի առաջարկությունը առավելապես պետք է հիմնավորեր նաև համապատասխան վիճակագրության ներկայացմամբ, քանզի կարծում ենք, որ չի կարող նման իրավիճակ լինել, երբ պետական մարմինը չտրամադրի Հաշվեքննիչ պալատին անհրաժեշտ տեղեկատվությունը:

3) Պետական գնումների ոլորտի նկատմամբ պետական ֆինանսական վերահսկողություն իրականացնող մասնագիտացված մարմնի՝ գնումների հետ կապված բողոքներ քննող անձի կարգավիճակը ուսումնասիրելիս, կարծում ենք, որ առավել համակողմանի եզրահանգումների համար հեղինակը պետք է այս ինստիտուտը համեմատական վերլուծության ենթարկեր՝ հաշվի առնելով արտասահմանման երկրների փորձը: Նման համեմատությունը կօգներ հեղինակին բացահայտելու այս ինստիտուտի իրավական կարգավորման բացերը՝ հաշվի առնելով միջազգային զարգացման միտումները:

4) Ատենախոսությունում հիմնավորվել է, որ պետական գնումների ոլորտի նկատմամբ ֆինանսական վերահսկողությունն իրենից ներկայացնում է իրավասու պետական



մարմինների իրավական նորմերով կանոնակարգված գործունեություն՝ ուղղված պետական բյուջեի միջոցների օգտագործման հիմնավորվածության, ճշտության, նպատակայնության և արդյունավետության ստուգմանը, որի արդյունքում երաշխավորվում է, որ պետական գնման միջոցով ձեռքբերումը կլինի պատվիրատուի կարիքին համապատասխան, հիմնավորված և համարժեք հատուցմամբ, տնտեսող, արդյունավետ և օգտավետ: Այս համատեքստում, գտնում ենք, որ հաշվի ատնելով ներկա զարգացումները, աշխատանքը ավելի շահեկան կլիներ, եթե հեղինակը քննարկեր այն հարցը, որ տնտեսող պետական գնման ապահովումը դեռևս չի նշանակում պատվիրատուի կարիքին համապատասխան և հիմնավորված գնման ապահովում:

Այնուամենայնիվ՝ ներկայացված դիտողությունները հիմնականում կրում են բանավիճային բնույթ և չեն նվազեցնում հետազոտության գիտական արժեքը:

Ամփոփելով վերոշարադրյալը՝ պետք է փաստել, որ գրախոսվող ատենախոսությունը պատրաստված է գիտական պատշաճ մակարդակով: Ատենախոսությունը պատրաստված և կազմված է ատենախոսության ձևավորման պահանջներին համապատասխան: Ատենախոսության հիմնական դրույթներն արտացոլված են հեղինակի հրատարակած 7 գիտական հոդվածներում, սեղմագրի բովանդակությունը համապատասխանում է ատենախոսության բովանդակությանը:

Բաֆֆի Գագիկի Նալչաջյանի «Պետական ֆինանսական վերահսկողություն իրականացնող մարմինների իրավական կարգավիճակի առանձնահատկությունները Հայաստանի Հանրապետությունում» վերտառությամբ թեկնածուական ատենախոսության վերլուծությունը հիմք է տալիս եզրակացնելու, որ այն համապատասխանում է ՀՀ կառավարության 1997 թվականի օգոստոսի 8-ի N 327 որոշմամբ հաստատված «ՀՀ-ում գիտական աստիճանաշնորհման կանոնակարգ»-ով ատենախոսությանը ներկայացվող պահանջներին: Հեղինակը ցուցաբերել է գիտահետազոտական-վերլուծական զգալի ընդունակություններ, կատարել է բազմակողմանի հետազոտություն, ներկայացրել է պատշաճ մակարդակով գրված, տեսական և գործնական զգալի նշանակություն ունեցող աշ-

խատանք, որի համար ատենախոսության հեղինակը կարող է արժանանալ ԺԲ.00.02- «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ իրավաբանական գիտությունների թեկնածուի գիտական հայցվող աստիճանի շնորհման:

**Պաշտոնական ընդդիմախոս,**

**իրավաբանական գիտությունների թեկնածու**

**Ս. ՔԱՂԱԼՅԱՆ**

3 սեպտեմբերի, 2020 թվական

Պաշտոնական ընդդիմախոս, իրավաբանական գիտությունների թեկնածու Սայադ Բադալյանի ստորագրությունը հաստատում եմ:

**ԵՊՀ իրավագիտության ֆակուլտետի**

**ղեկանի տեղակալ**



**Հ. ԽԱԶԻԿՅԱՆ**

3 սեպտեմբերի, 2020 թվական